

Na osnovu člana 14. Zakona o udruženjima i fondacijama ("Službene novine Federacije BiH" broj 45/02), na sjednici Skupštine Udruženja Geografskog društva u Federaciji Bosne i Hercegovine, održanoj 15.12.2011. god. u Sarajevu, Skupština donosi

## **S T A T U T**

### **UDRUŽENJA GEOGRAFSKOG DRUŠTVA U FEDERACIJI BOSNE I HERCEGOVINE**

(prečišćeni tekst izmjena i dopuna usvojen na Skupštini Geografskog društva u Federaciji Bosne i Hercegovine od 15.12.2011. godine u Sarajevu)

#### **I OPĆE ODREDBE**

##### **Član 1.**

Geografi u Federaciji Bosne i Hercegovine, kao i svi drugi geografi i zainteresirani državljani iz cijele Bosne i Hercegovine, dobrovoljno i slobodno se učlanjuju u Udruženje Geografsko društvo u Federaciji Bosne i Hercegovine (u daljem tekstu "Geografsko društvo") radi ostvarivanja profesionalnih aktivnosti, potreba i interesa iz oblasti geografske nauke i struke.

##### **Član 2.**

Ovim Statutom utvrđuje se:

- a) Naziv i sjedište Geografskog društva;
- b) Ciljevi i djelatnost Geografskog društva;
- c) Zastupanje i predstavljanje Geografskog društva;
- d) Ogane Geografskog društva, njihove ovlasti, način imenovanja i opoziva, trajanje mandata, kvorum i pravila glasanja uključujući i pitanja o kojima se odlučuje kvalificiranom većinom, funkciju lica ovlaštenog da saziva skupštinu;
- e) Oblik i sadržaj pečata Geografskog društva;
- f) Oblik i sadržaj znaka Geografskog društva;
- g) Sticanje i raspolaganje imovinom Geografskog društva;
- h) Način donošenja finansijskog izvještaja i izvještaja o radu Geografskog društva;
- i) Postupak za donošenje statuta, izmjena i dopuna statuta i drugih općih akata Geografskog društva;
- j) Uvjete i načine učlanjenja, prestanak članstva, kao i prava, dužnosti i odgovornosti članova Geografskog društva;
- k) Uvjete i postupak za udruživanje, razdvajanje, transformaciju i prestanak rada Geografskog društva;
- l) Pravila za raspodjelu preostale imovine u slučaju prestanka rada Geografskog društva.

## II NAZIV I SJEDIŠTE GEOGRAFSKOG DRUŠTVA

### Član 3.

Naziv udruženja je: Geografsko društvo u Federaciji Bosne i Hercegovine.

Skraćeni naziv je: Geografsko društvo.

Engleska verzija naziva je: Geographical Society of Federation of Bosnia and Herzegovina.

Sjedište Geografskog društva je: Sarajevo, ul. Zmaja od Bosne 33.

## III CILJEVI I DJELATNOST GEOGRAFSKOG DRUŠTVA

### Član 4.

Osnovni ciljevi Geografskog društva su:

- Predstavljanje i zastupanje interesa geografa u Federaciji Bosne i Hercegovine;
- Zalaganje za unapređivanje školske i naučne geografije;
- Stručna i naučna pomoć zainteresiranim javnim i privrednim subjektima i ministarstvima iz domena geografske nastave i nauke;
- Pomoć nadležnim ministarstvima u: rješavanju strateških pitanja razvoja Bosne i Hercegovine, geografskoj edukaciji, prostornom planiranju, turizmu i zaštiti životne sredine;
- Davanje mišljenja i prijedloga o nacrtima geografskih kurikulima na svim nivoima obrazovanja;
- Davanje mišljenja i prijedloga o nastavnim sredstvima u odgojno obrazovnom sistemu, posebno onih koja tretiraju geografsku problematiku;
- Predstavljanje geografske stvarnosti o Bosni i Hercegovini u inostranstvu;
- Saradnja i razmjena iskustava sa istim i sličnim udruženjima u regiji i svijetu;
- Održavanje kontakata i saradnja sa nadležnim državnim, federalnim i kantonalnim ministarstvima po svim pitanjima iz oblasti naučne i školske geografije, turizma i zaštite životne sredine, regionalnog i prostornog planiranja;
- Održavanje saradnje sa Unijom geografskih društava Evrope i svijeta;
- Izdavačka djelatnost u skladu sa Zakonom o udruženjima i ovim Statutom;
- Ostvarivanje i drugih ciljeva koji su u skladu sa Statutom i Zakonom.

### Član 5.

Osnovne djelatnosti Geografskog društva su:

- Organizovanje domaćih i međunarodnih naučnih i stručnih geografskih skupova (kongresa, simpozijuma, konferencija, seminara, savjetovanja, stručnih edukacija, radionica, izložbi i sl.);
- Realizacija istraživačkih projekata u svrhu teoretskog i praktičnog pojašnjavanja i rješavanja određenih prostornih procesa i problema;
- Organizovati i izvoditi naučne i stručne geografske ekskurzije u tuzemstvu i inozemstvu;

- Predlaganje nadležnim ministarstvima razgovora, savjetovanja i sl. radi rješavanja problema iz domena školske geografije, turizma i zaštite životne sredine, regionalnog i prostornog planiranja, strategije prostornog razvoja i regionalne organizacije Bosne i Hercegovine i sl.;
- Saradnja i međusobna komunikacija u cilju organizacije naučnih skupova sa međunarodnim učešćem sa predstavnicima istih ili sličnih geografskih udruženja u zemlji i inozemstvu;
- Iniciranje i davanje prijedloga za izmjenu nastavnih planova i programa iz oblasti geografije na svim nivoima obrazovanja, radi unapređenja geografske edukacije;
- Izdavanje naučnih i stručnih geografskih publikacija i to: naučnih časopisa, kongresnih i simpozijumskih zbornika radova, zbornika apstrakata, stručnih knjiga, geografskih metodičkih edicija i naučno-popularnih časopisa i dr. izdanja prikladnih za geografsku edukaciju;
- Pružanje pomoći članovima Geografskog društva u stručnom i naučnom usavršavanju i publikovanju recenziranih geografskih radova koja pripadaju posebnim izdanjima;
- Ostvarivanje i drugih djelatnosti koji su u skladu sa Statutom i Zakonom.

#### IV ZASTUPANJE I PREDSTAVLJANJE GEOGRAFSKOG DRUŠTVA

##### Član 6.

Predsjednik Geografskog društva zastupa i predstavlja Geografsko društvo, a u njegovom odsustvu zamjenik predsjednika Geografskog društva.

#### V ORGANI GEOGRAFSKOG DRUŠTVA

##### Član 7.

Organi Geografskog društva su:

- Skupština Geografskog društva;
- Upravni odbor Geografskog društva;
- Sud časti Geografskog društva i
- Nadzorni odbor Geografskog društva.

##### Član 8.

Skupština je najviši organ Geografskog društva.

Skupštinu Geografskog društva čine predstavnici članova Geografskog društva.

Izbor predstavnika za Skupštinu vrši se prema kantonalnoj pripadnosti, po principu jedan predstavnik na svakih pet članova Geografskog društva.

Izabrani kantonalni predstavnici u Skupštini su oni koji su se svojim radom u Geografskom društvu, posebno istakli u periodu između dvije Skupštine.

Odluku o imenovanju izabranih predstavnika u Skupštini donosi Upravni odbor Geografskog društva.

Izuzetno, Skupštinu koja ima karakter osnivačke Skupštine čine svi članovi Geografskog društva.

#### Član 9.

Upravni odbor Društva saziva Skupštinu Geografskog društva.

Skupština Geografskog društva može biti redovna i vanredna.

Redovna Skupština se održava jedanput godišnje.

Vanredna skupština Geografskog društva se saziva prema potrebi.

Vanrednu Skupštinu saziva Upravni odbor Geografskog društva na vlastitu inicijativu, na zahtijev Nadzornog odbora ili na zahtijev trećine članova Geografskog društva.

Redovna ili vanredna Skupština Geografskog društva mora se objaviti najmanje osam dana prije njenog održavanja sa naznakom datuma, vremena i mjesta održavanja sa navedenim dnevnim redom.

#### Član 10.

Skupština Geografskog društva može zasjedati ako je prisutna većina članova Skupštine, a odluke se donose ako za njih glasa većina prisutnih članova.

Za donošenje odluke o raspuštanju Geografskog društva i prilikom odlučivanja o žalbi člana Geografskog društva protiv odluke Suda časti o isključenju, potrebna je većina glasova svih članova Skupštine Geografskog društva.

Skupština donosi odluke javnim glasanjem, a na sjednici Skupštine se može odlučiti da se o pojedinim pitanjima odluke donose tajnim glasanjem.

#### Član 11.

Radom Skupštine rukovodi radno Predsjedništvo, kojeg na prijedlog Upravnog odbora Geografskog društva, bira Skupština Geografskog društva iz reda svojih članova.

#### Član 12.

Skupština Geografskog društva:

- Donosi statut, izmjene i dopune statuta i druge akte određene Statutom;
- Daje saglasnost na pravne radnje poduzete u postupku osnivanja Geografskog društva;
- Bira i opoziva članove Upravnog odbora, imenuje i opoziva predsjednika;
- Bira i opoziva članove Nadzornog odbora i Suda časti;
- Usvaja izvještaje koje je pripremio Upravni odbor ili njegov predsjednik;
- Odlučuje o udruživanju u saveze i unije geografskih društava, transformaciji Geografskog društva, prestanku rada i drugim statusnim pitanjima Geografskog društva;
- Odlučuje o svim pitanjima koja nisu u nadležnosti drugih organa Geografskog društva.

### Član 13.

Skupština Geografskog društva na Izornoj skupštini bira članove Upravnog odbora Geografskog društva, većinom glasova.

Skupština Društva na Izornoj skupštini bira predsjednika Upravnog odbora, većinom glasova.

### Član 14.

Upravni odbor je izvršni organ Skupštine Geografskog društva i sastoji se od 7 članova koje bira Skupština na mandat od četiri godine.

Upravni odbor se konstituiše na prvoj sjednici i bira, zamjenika predsjednika, sekretara i blagajnika.

Upravnim odborom rukovodi predsjednik Upravnog odbora, a u njegovoj odsutnosti zamjenik predsjednika.

### Član 15.

Upravni odbor može zasijedati ako sjednici prisustvuje većina članova, a odluke donosi većinom glasova prisutnih članova.

### Član 16.

Upravni odbor izvršava odluke Skupštine i rukovodi radom Geografskog društva u periodu između dvije Skupštine.

Upravni odbor naročito obavlja sljedeće poslove:

- Priprema sjednice Geografskog društva;
- Utvrđuje prijedlog Statuta, izmjene i dopune Statuta;
- Donosi poslovnik o svom radu;
- Utvrđuje prijedlog programa rada Geografskog društva;
- Brine o izvršavanju odluka i zaključaka Skupštine Geografskog društva;
- Upravlja imovinom Geografskog društva;
- Utvrđuje prijedlog finansijskog plana i završnog računa, te raspolaže sredstvima u okviru finansijskog plana;
- Podnosi godišnji izvještaj o svom radu Skupštini Geografskog društva na usvajanje;
- Odlučuje o prijemu članova Geografskog društva;
- Organizuje domaće i međunarodne naučne i stručne geografske skupove (kongrese, simpozijume, konferencije, seminare, savjetovanja, stručne edukacije, radionice, izložbe, terenske seminare, studijska putovanja i sl.);
- Formira organizacione i naučne odbore naučnih i stručnih skupova;
- Koordinira aktivnosti u vezi sa izdavačkom djelatnošću Geografskog društva;
- Imenuje Izdavački savjet i glavnog i odgovornog urednika geografskih izdanja;
- Razmatra prijedloge Izdavačkog Savjeta Geografskog društva;
- Ocjenjuje rad predsjednika i članova Upravnog odbora Geografskog društva;
- Utvrđuje Etički kodeks članova Geografskog društva;
- Donosi Pravilnik o javnim priznanjima Geografskog društva Društva;

- Donosi odluku o dodjeli odlikovanja i priznanja istaknutim članovima Geografskog društva;
- Donosi Pravilnik o usavršavanju članova Geografskog društva;
- Donosi odluku o izboru članova Geografskog društva za usavršavanje;
- Donosi odluku o visini jednokratne novčane pomoći članu Geografskog društva u slučaju teške bolesti ili teške invalidnosti.

#### Član 17.

Upravni odbor Geografskog društva može osnivati stalne ili povremene stručne komisije radi razmatranja pitanja iz posebnih stručnih područja.

Stručnom komisijom rukovodi predsjednik komisije kojeg imenuje Upravni odbor Geografskog društva.

Članovi pojedinih stručnih komisija su geografi – univerzitetski profesori i drugi istaknuti geografi iz prakse.

#### Član 18.

Predsjednik Upravnog odbora Geografskog društva je istovremeno predsjednik Geografskog društva.

#### Član 19.

Predsjednik Geografskog društva saziva sjednice Upravnog odbora i rukovodi radom Skupštine do izbora radnog predsjedništva.

#### Član 20.

Geografskog društva ima Sud časti koji se sastoji od tri člana.

Predsjednika i članove Suda časti bira Skupština na period od četiri godine.

#### Član 21.

Sud časti predlaže etički kodeks članova Geografskog društva;

Sud časti utvrđuje učinjene povrede etičkog kodeksa i predlaže Upravnom odboru i Skupštini Geografskog društva isključenje člana iz Geografskog društva ili o izrečenoj opomeni u skladu sa etičkim kodeksom.

#### Član 22.

Sud časti donosi odluke većinom glasova.

#### Član 23.

Geografskog društva ima Nadzorni odbor koji se sastoji od tri člana.

Predsjednika i članove Nadzornog odbora bira Skupština na period od četiri godine.

#### Član 24.

Nadzorni odbor prati rad Upravnog odbora i drugih organa Geografskog društva i jednom godišnje pregleda materijalno i finansijsko poslovanje Geografskog društva.

O svom radu i o uočenim nedostacima u radu drugih organa Nadzorni odbor podnosi izvještaj Skupštini Geografskog društva.

Nadzorni odbor radi u sjednicama i donosi odluke većinom glasova.

#### Član 25.

Stručne i administrativne poslove za potrebe organa Geografskog društva obavlja sekretar i blagajnik Geografskog društva.

#### Član 26.

Rad Geografskog društva je javan.

Javnost rada se ostvaruje elektronskim putem na vlastitoj web stranici.

### VI OBLIK I SADRŽAJ PEČATA GEOGRAFSKOG DRUŠTVA

#### Član 27.

Geografsko društvo ima pečat i štambilj.

Pečat je okruglog oblika, prečnika 30 mm i sadrži tekst latinicom na Bosanskom jeziku: Geografsko društvo u Federaciji Bosne i Hercegovine Sarajevo. U sredini pečata ispisana je godina 1947. (godina osnivanja Geografskog društva).

Štambilj je pravougaonog oblika dimenzija standardne veličine i sadrži bosansku i englesku verziju naziva Geografskog društva, sjedište i adresu.

Štambilj je pravougaonog oblika dimenzija 40x30 mm i sadrži: sjedište i naziv Geografskog društva, broj akta i datum.

### VII OBLIK I SADRŽAJ ZNAKA GEOGRAFSKOG DRUŠTVA

#### Član 28.

Geografsko društvo ima grafički znak u obliku globusa sa ucrtanim meridijanom i paralelom Sarajeva i ispisanim nazivom Sarajevo i geografskim koordinatama Sarajeva.

Oko globusa ispisana je naziv Geografsko društvo u Federaciji Bosne i Hercegovine.

#### Član 29.

Način upotrebe pečata i znaka reguliše se uputstvom koje donosi Upravni odbor Geografsko društvo.

## VIII STICANJE I RASPOLAGANJE IMOVINOM GEOGRAFSKOG DRUŠTVA

### Član 30.

Geografsko društvo stiče imovinu od:

- ✓ Članarine;
- ✓ Dobrovoljnih priloga i poklona fizičkih i pravnih lica;
- ✓ Sredstava dodjeljenih iz budžeta;
- ✓ Prihoda od kamata, dividendi, dobiti od kapitala, zakupnina, honorara i sličnih izvora pasivnih prihoda;
- ✓ Prihodi od publikacija, kotizacija i stručnih aktivnosti Geografskog društva;
- ✓ Drugih prihoda stečenih u skladu sa Zakonom i ovim Statutom.

### Član 31.

Članarinu Geografskog društva određuje Upravni odbor.

Članarinu plaćaju svi članovi Geografskog društva.

Članarina se uplaćuje za tekuću kalendarsku godinu, po pravilu početkom godine. Studenti i učenici, članovi Geografskog društva, uplaćuju 50% od visine godišnje članarine.

Prikupljena sredstava od članarina i drugih prihoda iz prethodnog člana, uplaćuju se na žiro-račun Geografskog društva.

### Član 32.

Upravni odbor vodi evidenciju o pokretnoj i nepokretnoj imovini Geografskog društva i vrijednosti imovine unosi u godišnji bilans.

### Član 33.

Geografsko društvo ima svoj žiro račun.

### Član 34.

Nalog za isplatu odobrava predsjednik Geografskog društva, supotpisuje ga još jedan član Geografskog društva, kojeg imenuje Upravni odbor.

### Član 35.

Poslovne knjige i finansijske izvještaje vodi biro/agencija, koju odabire Upravni odbor Geografskog društva.

### Član 36.

Sve ostale aktivnosti vezane za upravljanje imovinom i finansijskim djelatnostima vrši se u skladu sa Zakonom o udruženjima i ovim Statutom.



IX DONOŠENJE FINANSIJSKOG IZVJEŠTAJA  
I IZVJEŠTAJA O RADU GEOGRAFSKOG DRUŠTVA

Član 37.

Godišnji finansijski izvještaj o radu Geografskog društva za proteklu kalendarsku godinu Skupštini na usvajanje podnosi Upravni odbor.

Član 38.

Upravni odbor podnosi godišnji izvještaj o radu Geografskog društva kojeg usvaja Skupština Društva.

Član 39.

Na godišnji finansijski izvještaj i poslovne knjige o radu Geografskog društva prethodno mišljenje daje Nadzorni odbor.

X POSTUPAK ZA DONOŠENJE STATUTA, IZMJENA I DOPUNA STATUTA I  
DRUGIH OPOĆIH AKATA GEOGRAFSKOG DRUŠTVA

Član 40.

Statut Geografskog društva, kao i izmjene i dopune, donosi Skupština Geografskog društva.

Član 41.

Prijedlog Statuta Geografskog društva, izmjene i dopune priprema Upravni odbor Geografskog društva.

Član 42.

Prijedlog za izmjene i dopune Statuta u skladu sa Zakonom o udruženjima i ovim Statutom mogu pokrenuti članovi Geografskog društva.  
O dostavljenim prijedlozima stav zauzima Upravni odbor. Ako su prijedlozi opravdani Upravni odbor ih predlaže Skupštini Geografskog društva na usvajanje.

Član 43.

Poslovnik o radu Upravnog odbora donosi Upravni odbor Geografskog društva.  
Prijedlog Poslovnika o radu Skupštine Geografskog društva priprema Upravni odbor, a usvaja ga Skupština Geografskog društva.

## XI UVJETI I NAČIN UČLANJENJA, PRESTANKA ČLANSTVA, KAO I PRAVA, DUŽNOSTI I ODGOVORNOSTI ČLANOVA GEOGRAFSKOG DRUŠTVA

### Član 44.

Članovi Geografskog društva su geografi, koji dobrovoljno potpišu pristupnicu stupanja u članstvo Geografskog društva.

Članovi Geografskog društva mogu biti i druge zainteresirane osobe, državljani Bosne i Hercegovine koje dobrovoljno potpišu pristupnicu o stupanju u članstvo Geografskog društva.

### Član 45.

Geografsko društvo ima stalne i počasne članove.

Stalni članovi mogu biti državljani Bosne i Hercegovine, pod uvjetima iz prethodnog člana Statuta.

Počasni članovi Geografskog društva mogu biti oni građani Bosne i Hercegovine i strani naučni i javni radnici koje izabere Skupština Geografskog društva, a na pismeni prijedlog s obrazloženjem najmanje dva stalna člana Geografskog društva.

Pismeni prijedlog o počasnom članu Geografskog društva dostavlja se Skupštini putem Upravnog odbora Geografskog društva.

### Član 46.

Član Geografskog društva ima člansku kartu čiju formu i sadržinu propisuje Upravni odbor Geografskog društva.

### Član 47.

Članstvo u Geografskom društvu prestaje:

- Istupanjem iz Geografskog društva;
- Smrću;
- Isključenjem zbog povreda etičkog stručnog i naučnog kodeksa;
- Neplaćanjem članarine tri mjeseca uzastopno ili više mjeseci u toku godine.

### Član 48.

Odluku o isključenju iz članstva donosi Sud časti.

Protiv odluke o isključenju dozvoljena je žalba u roku od 15 dana Skupštini Geografskog društva, čija je odluka konačna.

Inicijativu za isključenje uz obrazloženi prijedlog može pokrenuti svaki član Geografskog društva.

Odluka o isključenju donosi se u pismenoj formi i dostavlja se isključenom članu najkasnije u roku od 30 dana od dana donošenja odluke.

#### Član 49.

Prava članova Geografskog društva su da:

- aktivno sudjeluju u radu Geografskog društva;
- bira i da bude biran u organe Geografskog društva;
- bude upoznat sa radom svih organa Geografskog društva;
- daje primjedbe na rad organa Geografskog društva i da daje prijedloge;
- uživa zaštitu Geografskog društva u slučajevima predviđenim ovim Statutom.

#### Član 50.

Dužnosti članova Geografskog društva su da:

- poštuje i realizira progamske ciljeve i zadatke propisane ovim Statutom;
- sudjeluje na naučnim i stručnim geografskim skupovima (kongresima, simpozijumima, konferencijama, seminarima, savjetovanjima, stručnim edukacijama, radionicama, izložbama, terenskim seminarima, studijskim putovanjima i sl.);
- sprovodi odluke i zaključke organa Geografskog društva;
- saraduje sa drugim članovima Geografskih društava radi ostvarivanja programskih ciljeva i zadataka Geografskog društva.

#### Član 51.

Odgovornosti članova Geografskog društva su da:

- redovno plaća članarinu;
- gradi i čuva ugled Geografskog društva;
- se zalaže za očuvanje digniteta geografa, geografske struke i nauke;
- se pridržava prosvjetne etike i naučnog kodeksa.

### XII PRESTANAK RADA I PRAVILA ZA RASPODJELE IMOVINE U SLUČAJU PRESTANKA RADA GEOGRAFSKOG DRUŠTVA

#### Član 52.

Geografskog društva prestaje postojati:

- Odlukom Skupštine Geografskog društva;
- Ako se broj članova smanji na manje od trideset;
- Ako rad Geografskog društva zabrani nadležni organ.

#### Član 53.

U slučaju prestanka rada Geografskog društva, Skupština Geografskog društva će donijeti odluku da se imovina Geografskog društva, nakon podmirivanja obaveza, predaje Odsjeku za geografiju Prirodno-matematičkog fakulteta Sarajevo do osnivanja udruženja/društva sa istim ili sličnim programskim ciljevima.

Ako se osnuje novo udruženje/društvo sa istim ili sličnim programskim ciljevima, imovina se predaje novom udruženju/društvu.

Član 54.

Kada Geografskog društva prestane sa radom, predsjednik Geografskog društva će podnijeti zahtijev nadležnom organu za brisanje Geografskog društva iz registra.

XIII PRIJELAZNE I ZAVRŠNE ODREDBE

Član 55.

Ovaj Statut stupa na snagu danom donošenja.  
Danom stupanja na snagu ovog Statuta, prestaje da važi Statut donesen 16.06.1997. godine.

Predsjednik Geografskog društva

---

Dr.sc. Nusret Drešković, docent

Sarajevo, 18.12.2011. godine

**OVJERAVA  
FEDERALNO MINISTARSTVO PRAVDE  
S A R A J E V O**

**Broj:  
Sarajevo,**

**MINISTAR**

**Zoran Mikulić**